



皇明開國功臣錄卷二

定遠黃金

胡大海

馮國用

耿再成

趙德勝

廖永安

俞通海

丁德興

張德勝

胡大海字通甫泗之虹縣人長身鐵面智力過人至正辛卯兵興天下大亂民遭溺焚俵俵無所棲止大海志存康濟思得真主而輔之歲甲午

太祖高皇帝駐兵滁陽大海杖策謁軍門一見語合遂

居前鋒以佐揚天威乙未春正月從克和州夏六月
翊渡江拔采石取太平丙申春三月進克金陵保有
其城遂攻下京口冬十一月徐達圍常州久不下張
士誠兵挾我叛兵攻達與湯和壘達勒兵與戰大海
自其壘來援內外夾擊大破之生擒張德丁酉春三
月克常州凡此諸捷大海或搴旗斬將或操矛弧以
先登前後屢建奇功乃授右翼統軍元帥宿衛帳下
夏四月又從破宣城

上命大海副樞密院判鄧愈戍守之五月取績溪秋七
月進兵徽州守將元帥門思午不花及建德路萬戶
吳納等拒戰大海擊敗之遂拔其城然吳守臣阿魯
灰孛克膺等退守遂安縣大海引兵追及於白鶴嶺
復擊敗之納等自矜元將楊完者聚兵十萬自上江
順流而下入杭城守之調省部鎮撫李才領圍徽州
欲復其城大海自婺源兼程以進橫槊而前大呼殺
入遂斬李才禽其將董旺呂昇衆皆披靡而遁戊戌
春三月克嚴州大海偕行降完者濠洞兵三萬以功
遷樞密院判官大海謂蘭谿云嚴州為密邇蘭谿下
則婺之右臂先斷遂引兵攻蘭谿冬十月乃下之十
二月從

上親取婺州陞僉行樞密院事大海益思有以自効已亥春正月攻下諸暨州張士誠將呂珍圍諸暨堰水以灌城大海率兵救之奪堰水灌珍珍勢蹙乃於馬上折矢誓辭求解兵大海許之都事王愷曰彼滑賊狡謀難信不如擊之可大勝也大海曰彼若再來吾有以待之且言出而背之不信既縱而擊之不武遂引兵還人服其威信秋九月取衢州冬十一月率兵一攻處州克之初

上定婺州即命耿再成駐兵黃龍山謀取處州元處州守將石抹宜孫遣元帥葉琛屯桃花嶺參謀林彬祖

屯葛渡鎮撫陳仲真照磨陳安屯樊嶺元帥胡深守龍泉以拒我師久之將士怠弛皆無鬪志至是琛叛宜孫間道來降且言處州兵弱易取大海聞之大喜即出軍抵樊嶺與再成合攻之大敗其兵連拔桃花嶺葛渡二砦遂薄城下宜孫戰敗棄城與葉琛章溢走建寧彬祖走溫州七邑皆下庚子夏閏五月陳友諒寇龍江

上命大海出兵擣信州以牽制之大海遣元帥葛俊率兵以往過衢州王愷止俊乘驛至金華謂大海曰信州為友諒門戶彼既傾國入寇必以重兵為守非大

將統全軍以臨之設若拌劍非惟信不可下吾獨先
繹騷矣大海從之乃率師說攻至靈溪城中步騎數
千出迎戰擊敗之督兵攻城守者不能禦衆潰遂拔
之改信州為廣信府時信方絕糧人皆勸大海還師
大海曰此閩楚之襟喉地也可棄之乎乃繕城浚隍
為堅守計辛丑夏五月

上憫其勞且以發為浙東大藩通甌引越匪宿將重臣
以控制之不可乃授大海江南等處行中書省叅知
政事守金華壬寅春二月金華苗軍元帥蔣英劉震
李福叛初約以是月七日舉兵是日英等入分省署

陽請大海至八詠樓下觀弩遂被害併害其子關住
發人知其死者莫不哀慟流涕如喪父母

上聞之亦痛悼弗置親迎喪于聚寶門外為文以祭且
命有司塑像配享晉卞壺廟明年癸卯大海舊部衆
戴慕其德營建廟像于郡城中區又明年甲辰

上念大海忠壯寬厚扶翊興運弘濟艱難身歷百戰功
冠一時不幸死於肘腋之變不可無旌卹之典於是
特贈光祿大夫浙東等處行中書省平章政事柱國
追封越國公遣宿衛之臣馬哈謀致祭于祠敘述厥
勞哀悼懇至罔有儔比洪武元年冬十二月命築壇

於雞籠山祭故功臣以大海為首二年春正月配饗
太廟夏六月功臣廟成肖像祭元勳二十有一人大海
位第七後復加贈開國輔運推誠宣力武臣特進光
祿大夫同知大都督府事謚武臣封勳如故大海為
將號令嚴明無敢違禁賞必當功罰必當罪故使人
攻必克戰必勝其守發也體愛部曲恤其飢寒救其
疾病境內民苦戰爭凋瘵殊甚竭心以撫摩之歲有
寧居長幼雍愉商賈以通布穀以登強暴者莫敢肆
嘗自誦曰我本武人不讀書然吾行軍惟知有三事
而已不殺人不虜人婦女不焚毀人廬舍故其軍一

也遠近之人爭趨赴之蓋虜心以仁濟事以威不言
而民化不戒而兵自不敢犯耕田鑿井者獲安其業
荷戈持戟者不至於愁歎方之古名將若祭征虜制
御士心不越法度所在吏民不知有軍及其死也立
祠饗之大海可以匹休矣初大海未薨嘗夜出人見
其兩目煜煜有光若燈及既薨敵兵有犯境軍中或
夢大海若生時或夜觀火光滿野洶洶若人馬聲師
出輒大捷似實有陰助者人咸異之蓋其英魂烈爽
下上於星辰之間固未嘗亡也天生豪傑夫豈偶然
開國名臣若大海者誠不可多得已子德濟以戰功

二卷
累官至浙江行省左丞自有傳

馮國用濠州定遠人先世繇泗徙光州其考徙定遠則自其祖信仁始父文質生子三國用國華國勝皆凝重異常兒國用尤氣清風儀整峻元季兵起文質挈三子避亂居東山教以讀書國用性敏過目輒成誦時有識者目之曰是即天上麒麟兒也馮氏其興乎及長器量恢豁不務侈靡喜閱孫武子窮晝夜不釋有意會處輒歎曰吾當以此佐太平取功名也文質雅器之時寇盜充斥所在繹騷民罔寧處里人因推國用為義長共立小寨保障鄉曲會

國朝兵興歲甲午同弟國勝率所部謁

太祖於妙山

上初見而奇之曰爾被服若是其儒生耶問定天下計安出國用對曰金陵龍蟠虎踞真帝王之都願先拔金陵而定鼎然後命將四征掃除羣寇救生靈於水火勿貪子女玉帛倡仁義以收人心天下不難定也上大悅曰吾意正如是由是日見親信俾居帷幄贊兵政預機密左右翼衛國用服事忠謹

上察透其底裏待以心膂弗疑從克滁州遇敵於三汊河揮戈擊之執其帥首乙未克和州版門寨敗雞籠

山等處寇兵時我師駐和陽者已數萬謀渡江國用
曰濟大川必利舟楫今舟楫未備宜少待會巢湖諸
將以舟師歸遂定渡江之計六月朔國用等引舟翊
上渡江值西北風順舳艫齊發舉帆向牛渚頃刻及岸
守者大駭兵不及支皆潰遂克采石乘勝徑取太平
元將陳也先來犯城下人馬三倍我師

廟筭制勝獲其全軍也先自死不得則願款附刑牲與
盟歎血而嘔國用言於

上曰也先深懷二心願勿聽其歸附之言當慮有不測
之害且其心如此必不令終矣後也先果被擒尋以
背盟誅其子兆先復屯營方山衆數十萬先是元中
丞蠻子海牙集淮兵二十萬擁樓船結寨采石至是
與兆先相為犄角窺伺太平丙申二月國用從攻采
石寨破之俘其人船中丞僅以身遁三月辛巳朔從
上破陳兆先營擒兆先盡降其衆擇其驍勇者五百人
置麾下五百人者多疑懼不自安

上覺其意是夕遣令入衛環

上而寢屏舊人於外帳前悉無兵士獨留國用一人侍
臥榻執兵束甲防護備至 上解甲酣寢達旦疑懼
者始安竟無他慮是月進攻金陵國用率五百人先

登陷陣遂拔之還軍從克鎮江大破元師京口既定
遂下丹陽擊寧國以功授萬戶丁酉克甘露松山望
亭戍戍克泰興宜興授大元帥守禦未幾陞帳前總
制親兵都指揮使專侍謀議時群雄割據

上固守江東諸郡以觀四方之勢乃謀取浙東十一月
從征金華十二月克之己亥正月克諸暨二月攻紹
興四月十五日卒年三十六

上哭之慟勅有司具棺槨喪事所需皆官給之賜葬江
寧縣鳳西鄉寬阜之原十月二十五日輿葬
車駕臨墓致奠親視下窆賜江寧地四十七畝為祭

田無征是時其子誠幼命國勝襲其職洪武元年十
二月築壇於雞籠山祭之二年六月功臣廟成肖像
祭元勳二十有一人國用位第八三年冬大封功臣
上謂廷臣曰曩馮國用典親軍時遵從有方動合古道
俄而因疾長逝朕念其勞贈開國輔運推誠宣力武
臣特進榮祿大夫右柱國同叅軍國事進封郢國公
復賜丹陽田二十四頃六十四畝有奇贍其家妻樊
氏封郢國夫人子一人即誠累有戰功仕至右軍都
督府都督弟國勝以開國大功封宋國公各自有傳
孫四人長仁次義次禮次智

耿再成字德甫泗州五河人少以勇力折行輩及長
識見洞達遭元季兵亂民苦塗炭乃奮然興曰拯溺
亨也吾丈夫志也不出將何為歲癸巳三月挺身謁
上于濠時上方延攬英俊見再成壯其材武留置左
右從征屢捷授百戶克泗州陞鎮撫甲午秋七月從
上克滁州因駐師焉元將脫脫分兵圍六合

上率師與再成守瓦果壘元兵攻之急每日暮攻壘垂
陷復去之明旦復完壘與戰如是者數四元兵致疑
上以計給之遂引去元兵不敢逼遂還滁州既而元兵
大至欲攻滁設伏澗側令再成佯去誘之度澗伏發

城中鼓譟而出內外夾擊元兵大敗滁城得完乙未
閏正月委令克和州與諸將同守元兵十萬來攻再
成等以萬人拒之連兵三閱月及夏乃解去復從擊
敗元太子禿堅及樞密副使絆住馬民兵元帥陳也
先所遣賊兵於雞籠山等處六月乘勝克取真州渡
江丙申三月十日庚寅克建康十七日丙申克鎮江
回守滁州六月陞授元帥統領萬衆守禦鎮江丁巳
十月克揚州降其統軍元帥張明鑑得衆數百戰馬
二千餘疋置淮海翼元帥府命再成守之戊戌十月
陞江南行樞密院判官階鎮國上將軍調守宜興回

守揚州十一月

上躬擐甲宵率師取金華再戍探戈為前鋒金華既平
慶州猶未入版圖己亥五月命再戍率兵屯緡雲縣
黃龍山規取慶州黃龍四圍斗絕其險可恃再戍乃
樹柵其上以遏其衝敵眾驅兵來鬪再戍咸擣覆之
十一月與僉院胡大海攻下慶州初再戍駐兵黃龍
元慶州守將石抹宜孫遣元帥葉琛屯桃花嶺參謀
林彬祖屯葛渡鎮撫陳仲真照磨陳安屯樊嶺元師
胡深守龍泉以拒我師久之將士怠弛皆無鬪志予
是深叛宜孫間道來降且言慶州兵弱易取再戍聞

之即遣軍拔樊嶺與大海合攻之大敗其眾連拔桃
花嶺葛渡二寨遂薄城下宜孫戰敗棄城與葉琛章
溢走建寧彬祖走温州七邑皆下慶州平立安南翼
遂命再戍統勁兵以鎮其土庚子六月壬子石抹宜
孫收士卒欲復慶州遂攻慶元知縣曾封不屈遇害
再戍兵至擊敗之宜孫走竹口力戰而死當是時民
罹戰伐之久生口寢耗或窟伏于林藪間再戍勞來
安輯至者如歸遂畜之氓之屯聚山堡久不來附者
剪其渠魁而釋其餘取下以嚴軍校斬人立木即捕
而誅之自是皆畏威出入之間雖哇蒞不敢採先是

士卒所至無論大小必徵私粟於民號曰若糧民甚厭苦之莫敢譁問再成怒曰吾民凋弊極矣爾曹仰食于官復剝其膏脂耶即往白胡叅政罷之民欣欣然依之如父母壬寅春二月九日軍中有舊降苗帥賀仁德李祐之扇其猶蠻衆至數千為亂再成方與客飲聞變即上馬收戰卒不滿二十人迎賊罵曰俘虜奴國何負於汝汝乃反耶俘虜奴汝急解甲降不降吾斫汝萬段以報國汝謂吾劍不利耶賊怒欲刺再成再成運劍連斷數槩賊將躍而前正中再成頸再成遂墮馬猶大罵不絕口而死時其子天壁方奉

命往虜起發苗軍中遂聞變馳至宋之忠所得再成舊部千戶朱絢等即與糾合張院判六往殺賊至則王師已先集攻破虜城仁德祐之俱就誅盡殲厥醜上命以衣冠改葬再成於金陵聚寶山追封高陽郡公以天壁嗣其原職仍鎮其土未幾勅令建廟慶州歲時祭享洪武元年築壇於京師祭之二年正月因祭太廟追念開國元勳皆命配享再成預焉六月功臣廟成塑像祭元功二十一人再成位第十三年天下大定論功行封以再成先為王事竭志執節至死不二又其功著在人心永世弗泯宜重嘉褒典以示勸乃

贈開國輔運推誠宣力武臣榮祿大夫柱國僉大都督府事加封泗國公命繪遺像賜其家茶果山園地二千七百畝以奉祀妻鮑氏繼室張氏俱封泗國公夫人六年三月

上念再成一德之臣遭際事變以身殉國崇報之義雖伸易名之典未舉下禮部議定謚武莊子男二長即天璧有戰功任杭州衛指揮改仁和衛洪武七年卒無嗣自有傳次天瑩早卒女一適黔寧昭靖王天瑩生高嵩生福福生雄雄生宏宏生輔

趙德勝濠州人世居清沿鄉遺碑在祖小

二皆隱處父仁贈懷遠大將軍指揮同知輕車都尉追封天水郡侯母李氏封天水郡侯夫人德勝狀貌魁偉膂力過人尤能馬上運槊捷疾如飛人不敢近至正壬辰江淮雲擾州縣簡拔梟銳為義兵知德勝勇悍選為群隊長時年二十有八每帥眾接戰必操短兵前驅雖赴湯蹈火有不暇顧敵人望而畏之然父在下列無有旌其功能者乃西走謁歸德王忙哥遂隸其麾下稍久察其軍無紀律有敗亡之兆因欲擇豪傑以從之而未有所歸歲甲午

上方統大軍駐滁陽德勝聞母夫人在軍中秋九月戊

寅遂盡其妻孥挺身來從

上喜得德勝可為騎將即命為帳前先鋒是年秋冬從上取鐵佛岡寨攻三汭河口破張家堡克全椒收六合大柳樹諸寨尋出師援六合左股為流矢所中幾危上親臨視焉乙未春正月攻羣盜雞籠山與韓把頭戰直搗烏江遂下和州平含山三月嘗夜襲陳也先營未幾也元來侵德勝力戰却之夏四月庚申拔板門寨五月擊鐵長官寨遂取儀真

上錄其功超忠勇校尉管軍總管府先鋒六月丙辰從上渡大江時元兵屯牛渚劔槩如林常遇春鼓勇先登奪其營分遣諸將下太平攻蕪湖句容取之秋七月辛卯克溧水八月破溧陽德勝皆與有功丙申春二月元將中丞蠻子海牙矚我師南征輒擁兵二十萬建柵采石磯以斷淮西之路時將士家屬皆留淮西上慮動搖其心命常遇春率師攻之德勝亦在行間乃以奇兵分其勢然後出正兵與戰短戈相接奇兵遂起而乘之元將大敗三月乙酉又大敗陳瑄先於方山庚寅下金陵德勝之功居多

上命徐達取鎮江以德勝為之副破苗軍水寨夏四月下丹陽及金壇五月取廣德平宣城轉承信校尉領

軍先鋒秋七月破偽吳張士誠水寨九月從常遇春
攻毘陵會青軍叛與張士誠合圍徐達於牛塘遇春
與德勝大敗其衆擒其梟將張將軍丁酉春三月壬
午取毘陵時羣雄並爭而民無定向曾未幾何廣德
宣城叛德勝從大將復取之夏四月戊辰征甘露取
江陰秋七月丙子攻常熟張士誠弟士德出挑戰德
勝應兵以進士德就縛遂征望亭無錫等寨戊戌春
二月從大將攻湖州夏六月率兵畧石埭縣與陳友
諒遇戰敗之擒其將錢清孟友德張遵道等及部卒
四百餘秋七月宜興復叛同大將往取之己亥夏
四月擢懷遠大將軍中翼左副元帥五月從攻池州
取青陽石埭當是安慶實荆楚咽喉之地勢不得不
取秋八月大將偕德勝往攻之冬十有二月從征杭
州庚子春三月還南京會偽將朱暹來攻官興德勝
帥師為援即破走之夏五月陳友諒既僭稱號以重
兵襲我太平遂直犯龍江

上大怒命諸大將分據險要授以成筭俾德勝及營陽
侯同守虎口城龍江第一關也既而陳氏兵大至陣
既交殺傷相當伏兵忽起陳兵大敗擒戮無數遂復
太平秋八月下銅陵臨山寨冬十月掠黃橋及馬馱

沙卒丑春二月從馮勝征高郵夏四月陞後翼統兵
元帥秋八月

上親帥六師伐陳氏以報龍江之役德勝從行經安慶
攻破其水寨遂乘風直泝上流過小孤山抵九江九
江陳偽都也距九江五里許友諒始知之謂神兵自
天而下蒼黃宵遁遂克九江獲其玉斝華蓋日月旗
等物德勝復分兵攻黃梅廣濟冬十月克瑞州臨吉
諸州旋師攻安慶下之十一月進克撫州友諒既遁
又謀移武昌德勝從命攻其轉口壩壬寅春正月從
上征南昌兵至彭蠡湖南昌降三月取新淦州己而祝

宗康泰據南昌叛殺其守葉琛德勝帥精甲從徐達
復其城夏四月甲午城破左肩為砲石所傷久乃瘳
上壯其為人超授僉江南等處行樞密院事羅友賢據
池州神山寨以叛冬十有一月從常遇春平之陳氏
餘黨建柵南昌之西山號為八陣指揮十有二月同
趙將軍攻之俘獲三千餘人時江右州郡雖已降附
往往觀望狐疑未決癸卯春三月臨江吉安撫州三
城又叛德勝皆統兵復之

上以南昌襟江帶湖控荆引粵實江西重地於是命置
大都督府以節鉞授都督朱文正同參政鄧愈鎮之

而俾德勝統精兵往受節制夏四月壬戌友諒帥強
兵數十萬空國而來圍南昌癸亥德勝統步卒千人
開城門迎戰偽將金指揮操戈直前德勝彎弓一發
應弦而仆敵氣大讐引兵暫退翌旦復合自是晝夜
環兵攻城友諒親督促之勢在必取城且壞德勝督
諸將死戰且戰且築城壞復完友諒盡攻擊之術而
德勝贊畫軍中分部將士隨方應敵剪獲甚衆六月
辛亥德勝巡城至東門敵發蹶張弩中其腰脅箭深
入約六寸即拔出之且拊髀歎曰吾自壯歲從軍傷
於矢石屢矣其害無踰於此者豈非命也夫丈夫死
即死正復何憾所恨者不能從主掃清中原稍効
微勛垂名於竹帛耳丁巳遂薨於私第年三十有九
軍中涕泣相弔

上聞之痛惜不已遣使致祭友諒既敗死南昌復平冬
十一月其子獻護柩至南京葬牛首山安德鄉上堡
上深念其功復遣內使賻以布帛菽粟有差甲辰春三
月命獻代領其衆秋九月下中書議贈祭祿大夫江
西等處行中書省平章政事柱國追封梁國公冬十
月 勅有司建廟南昌歲時祭享戊申春正月乙亥
上即帝位國號大明建元洪武追念開國元勳皆配享

仁祖淳皇帝廟庭德勝預焉二年功臣廟成肖像祭元
功二十有一人德勝位第九冬十月始給原追封誥
文曰開國之初朕賴英偉之士同心以拓疆土其有
捐身報國而歿於王事者朕深念之恤不遠大將軍元
帥趙德勝剛果有識勇毅超倫始自滁和奮跡行伍
從渡江拔平石取太平略地於溧水之陽破寨於臺
城之外遂定建康入丹陽毘陵其績漸著乃陞帥職
從大將取宣城江陰攻吳興錢塘收青陽石埭克宜
興高郵至於安慶九江武昌南昌之役其功益茂其
在江西平山寨討屬邑戰勝攻取朕甚嘉焉爰授金

樞之命豈期臨敵竟殞厥身於戲有功而不及親受
其報朕之念爾何能忘之是用陞之崇階列位台輔
仍封大國進于上公以示褒崇之重英靈如在尚克
欽承三年庚戌中原平定大封功臣改贈開國輔運
推誠宣力武臣特進榮祿大夫柱國同知大都督府
事封爵如故後謚武桓德勝沉鷲簡靜剛明質直馭
下嚴肅一號令之加旗幟為之改色是以戰無不勝
攻無不取每從大將征伐恪守軍令不違尺寸士論
以此多之平生未嘗讀書而隨機應變用智如神動
與古名将合雖臨陣不懼奮不顧身而平居篤於孝

友有士君子之行計自壯從戎身經百戰勤勞萬狀
一不自矜其功宏材碩器使天假年勲業不可名矣
是蓋開氣篤生

聖祖為天下君復生此名世之臣經綸而翼衛之豈偶
然哉配王氏先沒於軍追封梁國夫人子一人即獻
授懷遠將軍金吾右衛親軍指揮使司同知孫曾以
下世襲清浪衛指揮從曾孫輔以功封武靖侯

廖永安字彥敬廬州巢縣人少倜儻以氣自豪元季
壬辰江淮兵起與兄永堅結少年聚兵保鄉里從之
者稍衆遂約束以軍法時彭祖倡妖術於兩淮人多

應之永安兄弟充其萬戶甲午彭事解永堅他適永
安率戰船千餘艘與俞通海等俱屯巢湖為水寨以
捍寇患往來巡邏裕溪口及三汊河左君弼據廬州
作亂永安等頗為所窘乙未春聞

太祖駐和州人心向順知天命有在乃謀於通海遣人
詣和州納款備云諸將欲來歸強敵君弼梗道乞援
太祖大悅乃以歲夏五月親率兵至巢湖援之永安與
弟永忠及諸將共迎

上登舟出湖口至桐城聞已脫敵險未入江中丞蠻子
海牙集樓船塞馬場河以阻諸兵屯黃墩將號雙刀

趙者陰畜異志永安通海及張德勝等密露趙機從
上以計脫歸乃集商舟多載猛士復至黃墩與中丞戰
於裕溪敵舟高大不利進退永安等操舟如飛左右
奮擊大敗之追至雍家城生擒蕭羅二長官獲快船
三艘失傷鼻膂時敵兵既退又值雨水漲漫遂率兵
入大江至青沙坊再攻中丞水寨獲鬪船一十五艘
由是從容侍 上還於和州即攻破鱗魚洲鐵長官
水寨及新生沙寨獲人馬還

上遂令諸將定渡江之計六月乙卯朔永安引舟從渡
江時西北風順舳艫齊發永安舉帆前行向牛渚頃
刻及岸守者大駭出兵來拒

上麾甲者以進敵不及支即走諸軍奮擊采石兵驚潰
遂拔之乘勝徑克太平永安獲斗船二隻仍總水寨
一是月四日取丹陽湖十三日取小花塢十四日攻水
陽二十八日復征采石七月七日就留鎮禦江口十
六日連與賊船交戰敗之二十五日復征采石獲快
船三十隻八月十五日接管軍總管二十五日又克
水陽永豐塢十月二日復攻中丞水寨十二月五日
取常林岡唐寇寨十九日克蕪湖丙申正月朔又攻
中丞寨十九日復取小花塢等處二月十七日復攻

中丞期必拔乃大進舟師矢石如雨敵衆大潰生擒
吳長官等首目一十人明日又擒薛寇二十七人俘
獲兵衆以萬計蠻子海牙僅以身遁尋又於小花塢
收捕獲戰船十隻三月四日總兵攻破陳兆先營擒
兆先十日從攻集慶克之得軍民五十餘萬改集慶
路為應天府置天興建康翼統軍大元帥府以永安
為昭武大將軍統軍元帥

上既定金陵欲取鎮江命永安偕諸將將兵以往戒無
殺掠十七日丙申克鎮江平大沙下沙祝家等寨四
月取金壇五月攻常州六月取宣州獲馬數疋七月

張士誠兵寇瓜埠永安乘夜趣至鎮江擊敗之十一
月徐達等圍常州久不下張士誠挾我叛兵攻溧陽
湯和壘達勒兵與戰永安自其壘來援內外夾擊大
破之生擒其將張德餘軍奔入城丁酉三月常州平
以功陞同僉江南等處行樞密院事宿衛帳下十月
壬申同中翼大元帥常遇春自鈞陵進攻池州永安
去城十里而軍遇春及吳國寶帥舟師抵城下合攻
之自壬寅已破其北門遂入其城執元帥洪某斬之
擒副將魏壽徐天雄等敵衆敗走得糧九千餘石薄
暮敵復以戰船百餘艘來逆戰復大敗之遂克池州

復攻樅陽戊戌正月庚子與俞通海蔡世傑攻江陰
石碑海寇大獲偽州判朱定等船回奪馬駝沙降其
帥欒瑞并取爛泥洪黃山欒家沙等寨及橫丹三寸
港太湖太浦口宜興無錫等處生擒朱元帥陞同知
樞密院事六月甲午士誠兵寇常熟永安與戰於福
山港大敗之七月庚子破士誠兵於通州狼山獲其
戰艦而還八月總兵征蘇州值宜興復叛十月十二
日與徐達邵榮復宜興既拔其城永安復率舟師擊
士誠衆於太湖乘勝深入後軍不繼俄水淺舟膠遇
呂珍與戰不利遂為所獲士誠欲降之永安不屈遂

拘囚之後徐達援常州士誠弟士德來戰達遣王瑋
擊敗之擒士德上喜曰士德士誠謀主其人智勇
今擒之張氏之成敗可知矣遣人在平和好士德毋
痛之議歸永安以易士德

上不從士德死永安竟不獲歸甲辰十月

上念永安陷於強敵守義不屈遙授光祿大夫柱國江
淮等處行中書省平章政事封楚國公賜開國輔運
推誠宣力武臣有誥丙午七月丁未卒于姑蘇年四
十七訃聞上哭之慟親為文命配祭其功臣廟其
辭曰天生英賢昔為元民時遭兵變率兵自名出奇

破敵往來巢湖候吾親至以身相許舉衆和陽元年
六月東渡大江吾汝同舟汝奮威武時方卯辰巳登
采石仗汝之舟楫遂定江東連歲用兵吾以水旱各
調旱將可調者多水將汝常自驅旱兵數萬猶可出
奇汝握水兵僅及萬餘長江大湖聲威大振敵衆莫
敢當其鋒豈期一戰於太湖遂至身終喪此名將我
心傷痛非言可盡特新廟貌列于忠臣配享古賢名
垂不朽安靈之初用伸哀奠吳元年九月士誠就縛
永安之喪始歸自姑蘇

上迎于郊祭之曰惟靈賦質忠純夙稱勇敢念昔開基
之始爾方保禦巢湖不待諭言即通誠款既而大集
舟艦力贊渡江鼓擢洪濤奮身勇進是用大啓疆土
克壯皇猷佐命之勲爾固不少夫何禍生不虞陷沒
敵境予之痛悼于茲有年今者剪除殘孽浙右悉平
即命有司返爾靈樞惜爾不見國家永昌而猶以爾
得歸葬為少慰也嗚呼有功而不享其報有才而不
盡其用股肱之義寧不盡傷式奠于郊用宣予意靈
其有知尚克歆享賜葬鍾山之陰卹典優厚洪武元
年十二月命築壇於雞籠山祭之二年正月丁未祭
太廟以永安配享六年二月以

太廟配享功臣七人

廖永安俞通海張德勝桑世傑耿再成胡大海趙德勝

下禮

部議定謚號議得當有元失馭四海鼎沸英傑之士

或保有一方或統率義旅泯泯紛紛莫知所存屬

真主奮興天命有歸人心響應英傑之士不期自至若

龍行而雲從虎嘯而風生故能開創洪基輔成大業

若楚國公廖永安等七人者皆熊羆之士膂力之臣

立忠赴義以身殉國故或身陷於敵或歿於戰陣或

中流矢或遭事變大功未成身先墮亡

主上混一天下追悼其功隆其封贈俾爵祿及於子孫

其祀配於廟庭崇報之恩於斯為至易名定謚在

禮為宜楚國公廖永安按謚法赴敵無避曰武佐國

逢難曰閔請謚曰武閔

上可之四月定贈永安開國輔運推誠宣力武臣光祿

大夫柱國同知大都督府事楚國公十二年三月改

封鄖國公誥與前同妻亦改封鄖國公夫人九月以

其從子昇為淮安衛指揮僉事弟永忠以開國元勳

封德慶侯有本傳

俞通海字碧泉其先濠州蒲塘文賢鄉人父廷玉以

至元戊寅遷巢縣業農至正壬辰天下兵亂彭祖以

妖惑衆江淮人多應之通海父子從其部屬李普勝

為軍甲午彭事解泊舟巢湖與妖黨左君弼有隙戰
不勝遭其困乙未聞

太祖開閩和陽稟命於父遣使問道未曰通海父子與
諸將率舟師來歸強敵阻道未遂誠款乞發兵為援
上大悅謂幕官李善長曰吾率步騎駐和陽通江東今
士馬乏糧即欲渡江之舟楫通海父子以舟師全附
良應我機是年五月親率兵至巢湖諸將迎

上登舟謀出東口因大水舟至桐城聞已脫敵險然未
入江中丞蠻子海牙集援船塞馬場河口諸兵受阻
屯黃墩將號雙刀趙者陞高異志通海父子與李善

勝及將軍廖永安桑世傑張德勝華高趙誠傾心以
附密靈趙機上謀脫身歸聲言和陽取舟載兵同
攻蠻子海牙實欲以兵勢挾之遂得歸乃集商人舟
多載猛士復至黃墩督其兵攻蠻子海牙敵船高大
我舟與戰小勝通海與永安德勝操舟如神勇不可
犯猶未得入江值大雨連月水勢滔天諸將乃得縱
舟從上直趨和陽既至通海即於裕溪河攻中丞
水寨獲孫二等船二艘賊眾潰散繼攻鱗魚洲鐵長
官水寨及新生沙寨大獲人馬而還授萬戶六月朔
上大率舟師渡江明日克采石乘勝徑取太平皆如通

海謀擢管軍總管遂率水寨大軍攻取邊湖水陽八月攻行廊山汪縣克小花圩寨溧陽九月克銀渚東壩及固城湖民寨復取太平河三汊口與蠻子海牙戰克獲一船十月於灌渡橋河口獲快船擒賊帥屠子花等二十餘人時蠻子海牙悉驅戰艦結寨采石元帥陳也先子兆先合淮兵數十萬屯營方山相為犄角窺伺太平丙申正月通海攻采石寨二月復從上擊之以舟師進矢石如雨仍令軍士縱火焚其連艦遂大破之獲首目王興祖雷福舒壽等船俘其兵衆蠻子海牙僅數舟遁三月從平陳兆先營獲賊首宋

永福等軍馬善慶三月十日克臺城功右諸將遂領兵歷沙港焦門克阿魯麻者林苗軍水寨獲船及首目二十餘人十七日逼鎮江城西滅牌灣寨盡掠戰艦遂拔鎮江十八日撫定滕料沙竺家等寨追康元帥至第二港降之置秦淮翼元帥府以通海為統軍元帥四月取丹陽金壇丁酉三月常州平以功陞行樞密院判官宿衛帳下尋克江陰州宜興劉家河四月克宣城寧國長鎗諸軍復與樞判趙馘等乘勢趨水陽下之五月克大浦口遂以舟師入太湖馬跡山衝突賊舫軍聲雄震敵旗風靡降張士誠守帥王貴

鈕津盡獲其衆經東洞庭山艤舟施口偽左丞呂珍
率兵暴至諸將倉卒欲西退通海曰不可我寡退則
情見彼益集其衆邀諸險以擊我我何以當之不如
一與之戰於是身先士卒矢石左右交下通海不為動
徐令從者披已甲立船上督戰賊以為通海不敢逼
珍戰不利乃去克吳江與張冠遇敵血戰中矢近右
目傷劇矢鏃不出右目失明鼻且血數

上軫念親為祈福戊戌正月回樞密廖永安討江陰夫
子門石牌海寇盡獲偽官朱州判等船回奪馬馱沙
其帥欒瑞降四月攻雙刀趙復取蓋橋通州十月克

太湖宜興等處戰敗張冠水寨獲風快船三艘銳首
四十餘人時雙刀趙據樅陽己亥四月擊其柵江營
通海先俘趙牛兒等船士衆勇倍乘勝追殺賊大敗
棄舟岸走獲巨艦蒙衝數百艘進復池州擒偽帥洪
鈞等先是池州為雙刀所陷至是復之

上時親征浙東方憂趙賊剽劫聞捷大喜陞僉書樞密
院事七月攻安慶獲黃旗斗船十月與趙賊戰敗之
獲其帥孫四海船庚子閏五月陳友諒重兵犯龍江
上命通海同諸將擊走之通海追戰慈湖縱火焚其舟
賊衆大潰獲偽帥喻國興李智高等樓船數艘及甘

張方王陳五帥海舟俘賊人八十餘名追至采石復
與戰臂中流矢回賞銀枕錦段辛丑陞樞密院同知
上謂友諒殺主盜國又開兵釁擾我近疆親討其罪八
月大會騎步水軍舳艫聯屬通海率其部以從遂克
銅陵搗同安又搗九江偽都連衝蘄州黃州等郡友
諒遁入武昌以勲賞彩段六十疋壬寅四月取武昌
與敵戰於黃鶴樓聞祝宗叛南昌回軍擊之復其城
喜曰得南昌是去陳氏之一臂况其地實楚之重鎮
乎癸卯二月張士誠兵圍劉福通於安豐從
上援之大敗其衆回攻廬州時友諒憤國威財罄乃率

所有兵數十萬屯一國而來圍南昌期必拔七月丙戌
上大發兵帥通海等討之至則友諒即解圍東出鄱陽
湖以迎我師丁亥遇於康郎山戊子通海等進兵薄
戰徐達身先諸將擊敗前軍通海復乘風發火炮焚
寇舟二十餘艘軍威大振友諒驍將張定邊奮前欲
犯常遇春射中定邊定邊舟始退通海復來援與廖
永忠以飛舸追定邊定邊走身被百餘矢士卒多死
傷已丑復與友諒戰自辰至酉奮擊敵不能當殺死
者無算復以七舟載葦荻置火藥其中乘風縱火焚
戰艦數百艘烟焰漲天湖水盡赤偽王陳友仁陳友

貴平章新開陳等皆死溺萬餘人賊鋒盡挫明日通海等復以六舟深入鏖戰敵聯大艦擁蔽悉撻刀以死拒我師望六舟無所見意已陷沒有頃六舟飄飄而出旋繞敵船勢如游龍我師見之勇氣愈倍合戰益力呼聲動天地敵兵大敗通海等還

上勞之曰今日之捷請君之力也明日賊移舟欲遁我師先至壘子口及左蠡橫截湖面阻其歸路通海與眾議曰湖水有淺處舟難回還不利於戰莫若入江據敵上流彼舟若入即戍擒矣八月八日我舟入江駐南湖嘴水陸結營賊舟不敢出糧且盡二十七日

賊計窘統江下流欲由滌江遁回通海等退軍追擊之友諒中流矢貫睛及顱而死通海俘其御舟及指揮吳才等船明日漢明悉以樓船將校軍馬降附張定邊以小舟載友諒子陳理奔武昌九月

上還建康論功行賞賜通海四及金帛甲辰二月攻武昌陳理出降三月陞中書省平章政事總兵畧劉家港進迫通州淺勝獲偽院判朱瓊元帥陳勝千戶葛吉戰船十二艘四月廬州平元將樓兒張歸附改元肅政廉訪司立江淮等處行中書省命通海往攝省事守禦廬州時兵竣民心未寧通海綏定以恩復業

者衆郊野間聞稱通海者舉手加額慕如慈父脩築
郡城週迴凡四千七百六十餘丈惟西北濠經來龍
岡石骨難浚淺而易涸通海募人疏鑿深二丈五尺
由是壘峻塹深備禦嚴矣丙午四月從取濠州平安
豐攻鎮一作陽九月征浙西克湖州拔舊館烏鎮徑
寨十一月太倉民獻羊酒香貨迎降滿道通海却其
獻慰諭之約束軍士秋毫無犯民大悅偽帥陳仁等
乘大艘百餘已避入海聞通海仁聲復回鄉里稽首
麾下願為編氓者凡數千人番舶商帆由此還至崑
山崇明嘉定松江附風亦降吳元年三月大軍圍姑

蘇父不下徐相國檄通海共討通海於滅渡橋戰敗
賊寇提兵桃花塢蕩其營中流矢創其以四月九日
歸自軍中上幸其第見其病革顧曰平章知予來
問疾乎通海不能語遂揮淚而出明日薨年三十八
車駕復臨哭之慟從官衛士莫能仰視是月望塋金
陵城南聚寶山

上親為文奠于墓道又哭之慟贈光祿大夫追封豫國
公洪武元年冬命築壇于京師祭之二年正月配享
太廟六月祭于功臣廟三年大封功臣贈開國輔運推
誠宣力武臣光祿大夫上柱國同知大都督府事改

封號國公六年三月謚忠烈通海當世運草昧羣雄
競起能識

聖祖為真主委身來歸用其智武佐成大業名景元勲
功垂國史可謂豪傑之士而又沉機簡重出言合宜
勞不矜能和不踰節馭軍以嚴而政不苛恤民以惠
而法不撓非獨戎畧精強匹休古名將用於

朝廷亦輔弼之良也顧年不滿其所施惜哉父廷王
征安慶沒於陣贈河間郡公妻於氏封豫國公夫人
弟通源通淵俱以功封侯各有本傳

丁德興濠州定遠人亦有異徵驍勇善射死於兵

太祖高皇帝果義貌納豪俊德興以甲午歲城口歸附
上偉其材貌以黑丁呼之授萬戶是年六月取洪山寨
敵兵勁悍且數千德興所率者總百人一鼓而破之
擒其偽帥降其衆遂克藕塘及三汊河大柳樹七月
克滁州乙未閏正月克和州敗青山寇兵六月朔從
渡江時風順舟發如箭頃刻達岸守兵驚潰不及支
遂按采石乘勝取太平元將陳也先率兵數萬突犯
城下上方策應之德興分兵從取溧水溧陽邊湖
皆先登時蠻子海牙集樓船結若采石陳也先既敗
其子兆先復合淮兵屯方山旌旗相望以伺太平丙

申二月德興從克采石若養船數艘三月三日破方
山營擒兆先十日攻克金陵十七日取鎮江與徐達
湯和同領兵一日克其城兵不血刃陞管軍總管四
月下金壇尋下廣德宣州十二月領精兵從克牛塘
寨圍困常州丁酉三月常州平陞左翼元帥宣州復
叛四月率兵同元帥胡大海復之德興曰宣既降而
叛非人情必有激之者罪宜坐其首餘悉宥之勿治
上以鄧愈守宣州命德興分兵取諸路六月下江陰遂
取徽州石埭池州樅陽攻江州轉而擊安慶進攻湖
州屢建奇勲回軍又攻鄱陽九月克甘露援江陰攻

江西旁近州縣四兵勢四張所至克捷德興益思
効戊戌四月從攻雙刀趙十月克宜興先是徐達紹
榮攻宜興久不下議以其城西逼大湖口張士誠餉
道所由出若斷其餉道彼軍食內乏城破必矣乃與
德興分兵絕太湖口而併力急攻城遂拔之己亥春
上積其功授鳳翔衛指揮使攻廬州營于安豐未幾還
師庚子閏五月陳友諒犯龍江諸將分據險要以禦
德興與馮指揮守石灰山遇戰力擊敗之辛丑秋從
上征友諒搗安慶克九江壬寅復攻廬州癸卯三月張
士誠遣呂珍率重兵圍劉福通於安豐告急德興從

上往援之率先奮擊珍敗走左君弼引兵至復擊走之
俘獲士馬資仗無算士誠為之喪氣回攻廬州閱三
月將下聞南昌被友諒攻圍日久從

上親征過於康郎山德興同諸將殊死戰竟殲友諒遂
取鄱陽十月從征陳理於武昌甲辰二月武昌平回
攻廬州克之八月復援安豐乙巳春征進中興湖南
衡州等處多不戰而附閩十月克泰州海安壩攻通
州丙午三月克高郵下淮安八月征浙西擊常熟舊
館敗士誠兵十一月下湖州降李伯昇克吳江吳元
年同諸將圍蘇州將下八月十七日卒於軍年四十

上為之震悼

江寧縣安德鄉贈都指揮使誥曰朕

聞為人臣

宣力效忠者沒則必有褒贈之榮

所以報功也故鳳翔衛指揮使丁德興以武勇之資
拔身行伍委質事朕歷有戰功當征進蘇州之時方
圖報效竟以一疾長逝追念曩昔不忘于懷是用贈
爾驃騎將軍都指揮使以慰爾於冥冥爾其有知服
茲寵命復賜祭田若干頃洪武元年命築壇祭於京
師二年功臣廟成肖像祭元功二十有一人德興贈
大都督府僉事位第十二三年大封功臣追封濟國
公德興沉勇威厚仁而有信行師紀律嚴明不輕予

不妄殺有功而不伐

上以是重之嘗與諸將論征伐難處曰必得黑丁乃可其見重如此子三人忠浩祀忠洪武十年授龍江衛指揮使世襲累建征伐功二十三年卒有本傳浩祀恩賜守塋浩子廣廣子富世食田祿於江寧云

張德勝字仁輔廬州合肥人才畧豪邁沉毅剛果至正壬辰江淮兵起所在惑於妖論貿貿無所適德勝集義衆千餘與廖永安俞通海等各率所部泊據巢湖連結水寨以觀時變會左君弼據廬州與黃墩將趙普勝聲勢相倚德勝等與戰不勝遭其厄不未聞

太祖駐師和陽豪傑響附乃謀於通海遣人以書納款云諸將欲來歸君弼梗道乞為援之

上大悅謂李善長曰吾衆已數萬所乏者糧欲渡江之舟楫德勝等以舟師全應殆天意也機不可失歲五月親率兵至巢湖諸將迎上登舟乘大水舟至桐城聞已脫敵險然未入江中丞蠻子海牙集樓船塞河口以阻諸兵趙普勝陰畜異志德勝等密露趙機上謀脫歸和陽乃集商舟多載猛士復至黃墩攻蠻子海牙敵舟高大不利進退德勝等以小舟與戰操縱如飛左右奮擊大敗之猶未得入江會大雨連旬德

勝等喜曰水勢滔天身可越山尚何俟舟乃發中途
遇嶺有澗斷嶺脊上有潯陽橋羣舟盡過橋洞
上所乘舟差大意洞不能容欲棄而乘他舟比至洞纔
餘毫髮而度直抵和陽營于新河是月二十八日破
鐵長官水寨新生沙寨獲人馬還授萬戶六月朔翊
上渡江時風順水湧舟頃刻達牛渚守者駭走遂拔采
石乘勝徑取太平義兵元帥陳也先與其將康將軍
水陸分道寇城德勝同湯和擊其水軍會徐達鄧愈
擊其步軍遂擒也先推太平興國翼管軍總管分兵
攻深水克之是年冬蠻子海牙悉驅戰艦結砦采石

也先之子兆先復屯營方山衆數十萬崎角相望以
伺太平丙申二月攻采石砦德勝同永安以舟師進
矢石雨落遂破之蠻子海牙僅以數舟遁三月辛巳
卜率德勝等取集慶路大破方山營擒兆先盡降其衆
庚寅克集慶得兵數十萬丙申克鎮江陞秦淮翼元
帥四月克金壇八月從攻常州圍之丁酉三月常州
平以功陞樞密院判官四月從克宣州收長鎗諸將
五月下大湖舟入馬壩山招降張士誠偽帥王貴等
遂攻宜興八月攻馬獸沙戍戊戌正月同廖永安俞通
海討江陰石牌海元蠻敗之盡獲偽州判朱錠等船

回套馬馱沙降其帥樂瑞陸僉樞密院事四月趙普
勝以其主徐壽輝及其平章陳友諒之命自棧陽寇
池州德勝率兵往援至則守將趙忠被執城已陷矣
德勝抱憤銳圖克復十月從徐達下宜興己亥三月
普勝復寇青陽五埭等縣德勝統精兵與戰於柵江
口破走之四月復同俞通海擊普勝大敗其衆獲巨
艦數百艘遂復池州九月德勝引兵自無為登陸夜
至浮山砦擊走普勝部將胡總管敗之於青山追至
潛山界陳友諒叅政郭泰領兵至沙河迎戰德勝復
大破之斬郭泰獲馬騾牛羊千餘軍資無筭遂克潛

山庚子五月陳友諒以重兵襲我太平遂真犯龍江
上大怒命諸將據險以禦以德勝總水陸大軍擊之既
而陳氏兵大至陣既交殺傷相當德勝乃從中大呼
麾諸行士奮擊友諒敗走其將張志雄梁鉉喻國興
劉世行等皆降斬獲下可勝計志雄因言友諒東下
盡併安慶兵以從今既敗安慶無守禦者
上乃遣德勝與徐達馮勝等追友諒至采石復與大戰
德勝死于陣年三十三事聞

上痛惜不已贈都督進封恭國公具衣冠葬金陵鳳臺
門外洪武元年冬築壇于京師祭之二年正月配享

太廟六月肖像祭于功臣廟三年大封功臣贈開國輔
運推誠宣力武臣光祿大夫柱國同知大都督府事
封爵如故仍賜江寧上元鎮江揚州常州寧國和州
等處山塘廬場土田五百頃贍其家六年三月謚忠
毅德勝當天下未定潛測天意擇
主依歸運謀効武佐成

帝業可謂識時俊傑而又死忠王事大節屹然一時開
國之英勲名赫奕鮮有踰之者矣夫人陶氏子宣初
德勝死宣年幼命其養子同襲職洪武二年宣年長
同亦自立軍功乃命宣襲父職同復其姓名為汪興

祖興祖以開國功封東勝侯自有傳宣初授安遠將
軍宣武衛指揮同知改懷遠將軍神策衛指揮同知
十三年左遷沂州衛千戶十八年召回陞中軍都督
府僉事以事罷十九年征散毛洞有功仍授神策衛
指揮同知沅州操練二十一年以軍務之雲南坐失
彩段謫戍金齒卒孫翬有戰功曾孫昂曼玄孫勇世
襲廬州衛指揮同知

皇明開國功臣錄卷三

定遠黃金

陶安

宋濂

章溢

王禕

陶安字主敬太平當塗人少敏悟有大志博涉經史尤深於易元至正甲申舉浙江鄉試戊子禮部試下第行省授明道書院山長調高節書院乙未夏六月太祖帥師渡江取太平路安與耆儒李習率父老出迎安見上狀貌謂習等曰龍姿鳳質非常人也我輩今有主矣上召安與語時事安因獻言曰方今四

海鼎沸豪傑並爭攻城屠邑互相長雄然其志皆在
子女玉帛取快一時非有撥亂救民安天下之心今
明公率衆渡江神武不殺人心悅服以此順天應人
而行弔伐天下不足平也 上曰足下之言甚善吾
欲取金陵何如安曰金陵古帝王之都龍蟠虎踞限
以長江之險若取而有之據其形勝出以臨四方則
何向不克其言合 上意即留叅幕府禮遇甚厚事
多與議未幾命為都事丙申春三月從克金陵秋七
月置江南行中書省拜左司員外郎陞郎中日贊機
務既而得劉基宋濂章溢葉琛四人 上問四人者

何如安對曰臣謀畧不及劉基學問不及宋濂治民
之才不如章溢葉琛 上多其善讓辛丑秋九月克
黃州思得重臣以鎮之曰無逾安者遂命知黃州至
則艾荆棘開府治寬賦稅省徭役安輯民庶政務一
新民悅服之甲辰移知饒州 上賜以詩曰匡廬岩
穴甚濟濟水怪無端盈彭蠡鱷魚因韓去遠洋陶安
鄱陽即一理時方征伐急軍需安勸諭誘率其民民
皆樂輸而用不乏招徠有方流亡四集乙巳冬十月
癸丑信州盜蕭明率兵攻城安召父老告之曰國家
承天運除禍亂兵甲之盛所向無敵今逆賊扇餘黨

驅烏合而來徒貽民害不足畏也我糧實城堅素有
其備但結衆固守不過數日援兵至破賊必矣衆皆
諾安與千戶宋炳率吏民分城拒守選勇卒為游兵
晝夜巡捍而請救於江西行省安登城諭賊曰爾衆
吾民也反為賊用得無失計乎衆曰使皆如太守總
制豈有今日若破城必不相害安命射之矢下如雨
賊不敢逼越三日江西行省遣千戶陳明來援遂大
敗之蕭明遁去擒偽招討都海萬戶常勝斬之饒遂
安諸將以鄉民多從賊欲屠之安曰民為所脅耳從
賊非本心柰何殺之由是民皆得全 上聞遣使徃

勞之明年入朝民為之歌曰千里榛蕪侯來之初萬
姓耕闢侯去之日既而命復守饒州民懷其德復歌
之曰湖水悠悠侯澤之流湖水有塞我思侯德相率
建生祠事之吳元年夏五月初置翰林院首召安為
學士賜誥曰蓋聞國家之立必有一心之臣尊戴匡
輔用能張其綱紀植其表儀正其位名善其辭命基
圖以大國家以安自古皆然朕之初渡江也江南之
士杖策謁二軍門者陶安實先即以帝王事功期於
始見之際贊襄兵務多歷年所宣號令則軍民信議
禮刑則體要成建陳之論以忠出納之命惟允雖艱

難繁劇一不以動其中真為一心者焉至於牧民而
民安治吏而吏服捍城禦侮寇慙成擒列郡宴寧其
勞則著肆朕君臨大寶念此翊運舊臣老當優之不
欲久煩以政乃者開翰院以崇文治立學士以冠儒
英重道尊賢莫先於爾是用擢居宥密俾職論思茲
特授以寵章用昭國典尚其勤於獻納贊我皇猷綜
理人文以臻至治可翰林學士嘉議大夫知制誥兼
脩國史時方召四方宿儒集闕下議禮制命安總
之冬十月 詔脩律令安為議律官洪武元年春正
月辛巳安與中丞劉基言於 上曰適聞中書及都

督府議倣元舊制設中書令欲奏以 太子為之
上言元舊制不足法太子不可為中書令因選廷臣勲
德老成動有典則者兼東宮官職以備輔導丁亥
上御東閣安與中丞章溢等侍因論前代興亡之事
上曰喪亂之源由於驕佚大抵居高位者易驕處佚樂
者易侈如此者未有不亡今日聞卿等論此深有儆
於予心古者今之鑑豈不信歟癸巳 上與儒臣論
學術安對曰道之不明邪說害之也 上曰邪說之
害道猶美味之悅口美色之眩目人鮮不為所惑自
非有豪傑之見不能決去之也夫邪說不去則正道

不與正道不與天下烏得而治安曰 陛下所言深

探其本二月壬寅朔安與省臣等進郊社宗廟議

國從之壬子復奏言天子大社必受霜露風雨以達

天地之氣若亡國之社則屋之不受天陽也今於社

稷壇創屋非禮若祭而遇風雨則於齋宮望祭

上是之戊辰復奏議天子冕服之制安自入翰林國家

制度禮文多所定擬撰文武誥命千餘 上賜對曰

國朝謀畧無雙士翰院文章第一家時有御史言安

隱過 上曰朕素知安安豈有此且爾何由知之對

曰聞之道路 上曰御史但取道路之言以毀譽人

以此為盡職乎命黜之夏四月癸亥置山東行中書

省調江西叅政汪廣洋為山東叅政以安為江西叅

政 上因謂安曰朕渡江之初卿首率父老見於軍

門為朕敷陳王業論當時之務深合朕心由是朝夕

相近幕府軍旅之事裨益良多繼入翰林益聞讜論

今調汪廣洋為山東叅政而江西乃上游都會可以

代之者宜莫如卿其為我撫治之安對曰臣以微陋

叨蒙甄錄俾居左右幸望過矣今復委以重任恐付

託不效有負 聖恩 上曰躬探甲冑決勝負於兩

陣之間此武夫之事非儒生所能至若承流宣化綏

輯一方此儒者之事非武夫所能也朕之用人用其
所能不強其所不能卿才宜膺是任故以授卿我豈
私卿一人而不愛一方乎安乃頓首受命既 陛辭
上賜以誥稱許倚任甚重在任寬仁厚德吏民畏服秋
九月癸卯以疾卒年五十七疾劇猶草時務二十事
上之訃聞 上哀悼累日親製文遣使以祭追封姑
孰郡公祖大宥父文興祖母母妻皆追封姑孰郡公
侯及夫人時人榮之愚觀自古帝王取天下當其奮
武載征必有名臣碩輔明其出師之統紀以開其初
心使之志嚮有定然後師旅所至足以除暴救民興

起大業若勸王濬中之計遮說新城之略杖策鄴上
之謀皆有得乎此我

聖祖之渡江也安最先獻策惟以不耽色貨不嗜殺人
為弔伐之舉其言光大純正本天命而切人心施之
當時猶拯焚救溺深得取天下之要豈惟漢臣效忠

高光雖伊呂之徒啓告其君者亦不是過而
聖祖撥亂濟世之志寔與符合自是征伐所加率用是
道是故仁義之名出而帝王之統紀如日月之不可
掩堂堂湯武之師復誰敵哉于焉殪強漢殲偽吳坐
奠南服席卷中原卒使一統鴻業之成肇于首謁轅

門之數語若安可謂王佐之才矣惟其超悟絕識決
真主於一見此為獻言之本由是觀之安之不顯於
元非元擯南士弗用也天實儲賢為

聖祖開萬世太平之具非其時不以出非其主不以授
也於戲不觀明良之遇無以見 皇祚之所由隆不
觀嘔喻之受無以見明良之所為遇然則安之於
聖祖其千載一時者乎

宋濂字景濂金華人在姪七月生兒時苦多病六歲
為詩歌有奇語操筆立就人呼為神童稍長從學吳
文貞萊盡得其蘊奧當是時翰林待制柳公貫學士

黃公潛歐陽公玄皆大儒於濂文皆極稱許推讓之
濂遂以文章名海內至正中大臣薦為翰林國史院
編脩官固辭入龍門山著書歲庚子

太祖皇帝定鼎金陵遣使徵至以為江南等處儒學提
舉十月奉 旨授 皇太子經每遇綱常大義開陳

不倦壬寅八月 上召濂講春秋左氏傳畢濂起曰
春秋乃孔子褒善貶惡之書苟能遵行則賞罰適中
天下可定也甲辰改起居注侍 上左右知無不言
補益甚衆明年正月 上御端門論及黃石公三畧
且口稱之濂進曰尚書二典三謨帝王大經大法靡

不畢兵額。陛下留意講明之。上曰朕非不知典謨為治之道，但三畧乃用兵攻取時務所先耳。

上詔丞相李善長歸江西軍中，所掠牛於其民無牛者，官給之，勿取其租。丞相退。上顧濂曰：向所言事當

乎？對曰：民富則君不至獨貧，民貧則君不至獨富，捐利於民實興邦之要道也。三月以疾告還家，賜金帛。皇太子致贈有加焉。六月，上箋謝。恩復奉書。

皇太子勉以孝友恭敬，勤敏讀書，無怠惰無驕縱，進脩德業，以副天下之望。上覽書甚喜，召太子語以

書意，且賜書答其田，各曰：曩者先生教吾子，以嚴相訓

是為不佞也，以聖人文法變俗言教之，是為疏通也。所守者忠貞所用者節儉，是為得體也。昔聞古人今則親見之，復以文綺侑書，既而丁父憂。洪武二年

詔徵濂總脩元史，除翰林學士、亞中大夫、知制誥，兼脩國史。逾年書成。上欲剖符封功臣，議五等封爵。

召濂宿大本堂，據歷代故實討論詳定。時甘露屢降，上問災祥之故，對曰：受命不于天，于其人；休符不于祥，于其仁。是以春秋不書祥而紀異為是故也。上姪文正以荒淫擅殺得罪，濂曰：文正罪固當死。陛下體親親之義，生之而置諸遠地，則善矣。上嘗言古

之帝王當宴安之餘多好神仙以朕言之使國治民
安心神怡康即神仙也對曰漢武好神仙而方士至
梁武好佛而英僧集使移此心以求賢輔天下其有
不治乎 上深然之 上既追封外王父為楊王立
廟京師御通天冠絳紗袍以祭祭畢召大臣問曰朕
祭外王父卿等以為不當服袞冕何也濂對曰袞冕
惟祭天地宗廟用之餘則當降禮也 上嘗祀方丘
患心不寧濂進曰孟軻有言養心莫善於寡欲審能
行之心清而身泰矣 上稱善久之五年擢太子贊
善大夫 上問帝王之學何書最要濂請讀真德秀

大學衍義 上覽而悅之令左右大書揭之兩廡之
壁時睇觀之六年二月 上御西廡大臣皆坐待

上指衍義中言司馬遷論黃老事令濂講析俾在坐者
聽之濂既如 詔復言曰漢武嗜神仙之學好四夷
之功民力既竭重刑罰以震服之臣以為人主能以
義理養性則邪說不能侵興學校教民則禍亂無從
而作矣刑罰非所先也 上曰朕之為君上畏天地
下畏兆民兢兢業業不敢自逸對曰 陛下此心古
先哲王之心也慎終如始天下幸甚 上御齋室問
三代曆數封疆之脩短廣狹濂歷言之且曰三代之

治天下也以仁義故歷年之多後世莫及 上從容
謂曰 皇太子留心治道卿等宜常與論議庶廣識
見幸善調護之七月陞侍講學士中順大夫知制誥
同脩國史仍兼贊善大夫奉 詔搜萃歷代姦臣之
蹟編為辨姦錄及進 太子諸王各分賜焉 上作
祖訓錄成命濂序之嘗侍 上至後苑觀穫 上曰
農事成矣對曰國以民為本民以食為天 陛下知
稼穡之艱難而念民生之良苦實盛德也八月奉
旨纂脩大明日曆一百卷擇言行之大者為寶訓五
濂總裁其事朝夕禁中至七年五月乃成濂自以布

衣沐非常之遇凡有任使靡晝靡夜躬閱載冊書于
牘進之或覆視于冊一字不遺濂在朝久若郊社宗
廟山川百神之典朝享宴慶禮樂律曆衣冠之制四
夷朝貢賞賚之儀及勲臣名卿焯德耀功之文承
上旨意論次紀述咸可傳於後世在 上前所陳說不
為文飾隱蔽雖家事苟有問亦一一道之常曰君猶
父也天也其可欺耶 上欲俾參大政辭曰臣少無
他長惟文墨是攻不願居職任也 上愈厚之每燕
見必命茶賜坐每旦令侍膳詢訪舊章講求治道屢
有所建明召問廷臣臧否第言其善者或命賦詩為

文必寓忠告嘗奉制詠鷹令七舉足即成有自古

戒禽荒之言上欣然曰卿可為善諫矣上嘗與

濂飲濂辭上強之至三觴面如赭行不成步上

歡笑親御翰墨賦楚辭一章以賜仍命侍臣咸賦醉

學士歌曰俾後世知朕君臣同樂若此也九年六月

拜翰林學士承旨嘉議大夫知制誥兼脩國史

上謂濂曰朕以布衣為天子卿亦起草萊列侍從為開

國文臣之首俾世世與國同休不亦美乎趣令取子

孫官之復以濂艱於行步特詔皇太子選良馬以

賜上親御馬歌詔群臣咸作之以寵濂焉時一詔

許言事朝臣有上疏萬餘言者上厭其迂術怒欲

罪之以問羣臣有阿意者指其疏曰此不敬此詆謗

罪當誅上答之而罷怒未解召濂問濂曰彼應

詔上疏其心忠耳烏可深罪乎上默然已而覽疏

中有足采者召阿意者罵曰吾方怒時若等不能諫

乃激吾誅之何異以膏沃火向非宋景濂之言幾不

誤罪言者耶上嘗廷譽濂曰古之人太上為聖其

次為賢其次為君子若宋景濂者事朕十有九年而

未嘗有一言之偽誚一人之短寵辱不驚始終無異

其誠所謂君子人乎匪惟君子抑可謂之賢者矣十

年二月致仕歸瀕行賜緡幣文綺及御製文集

皇太子贈以衣三襲上諭曰朕最慎于賞予嘉卿

忠誠可貫金石故以是賜卿卿今年幾何矣曰六十

有八上曰歲此綺俟三十二年後作百歲衣也濂

叩首謝至家拜表謝恩仍上箋皇太子申明正

心治國之要上賜詔褒荅大旨謂為忠良之臣勲

業既著文章必傳功成身退惟先生獨全初濂將辭

請歲一來朝是年九月入朝上佇想已久廷問屢

矣及至大喜加勞再三白玉太子諸王皆歡動顏色

越翌日上降敕符遣儀曹官奉醪膳諸物抵寓館以

賜自是日侍上遊歷觀闕盤旋禁禦詢諮備至便

殿侍食日晏始退上喟然歎曰純臣哉爾濂方今

四夷皆知卿名卿其自愛濂遜謝不敢當歲暮辭還

復遣中貴賜上尊所行數日上問其子璠曰朕疇

昔之夜夢見爾父笑談如曩時爾父雖去其容儼然

在朕目中也璠叩頭謝曰非陛下垂念臣父之至

何以形諸夢寐中書舍人史靖可太子正字桂彥良

等皆為詩歌以紀之蠻夷朝貢者數問先生安否曰

本得涪溪集刻板國中高句麗安南使者至購文集

不啻拱璧而瀛躬然自持似不能言者嘗曰古人之

為學使心正身備措之行事俯仰無愧而已繁辭復
說道之蔽也尤篤於倫品處父子兄弟夫婦之間者
皆可為法與人交和易任真無鈎距縱為所給亦弗
與較臨財廉非義不取日本使奉教請文以百金為
獻卻不受 上以問濂對曰天朝侍從之官而受小
夷金非所以崇國體也 上深然之接引後學惟恐
弗及遠方來者授館而飲食之內誠外恕一出於正
故上下信服平居布衣蔬食無異貧士不事生產不
置田地或勸為子孫計曰富貴豈一家物哉吾乃所
以遺之也自少至老未嘗一時去書不觀及致仕歸

青蘿山閉門纂述人不見其面視近甚明一忝上能
作十餘字人以為不飲酒寡嗜欲所致十三年冬孫
慎以罪被刑濂安置茂州以疾卒於夔州臨歿端坐

歛手而逝年七十二

方孝孺曰可名之功衆人知之難名之功君子知之至於不見

其功而天下陰受其利者非聖賢之徒不能知也周
之積累舊矣由太王傳數世以及於武王用八百諸
侯之助而始克商夫豈一人之德一日之功也哉而
孟子歸諸太公伯夷二老以為二老者天下之父也
天下之父歸之其子焉性信是言也則武王之武可
不用而周徒以致人望而王孟子之言不幾於過乎
然事固有立乎此而應乎彼者山嶺出雲而霖雨被
四海人以為霖雨之澤也而不知本於山嶺之助賢
人鍾儒之於國家不必有赫赫然之功而及其物常在
乎專為之外謂天下果與于斯人衆人未必知其而信
之然欲天下之安定非斯人亦莫之能也高祖之於
子房世祖之於卓茂舉旗斬將不與焉而尊禮在羣

臣之上蓋其道德可以馴暴革姦智謀可以開惑定
事之論風采信于人而傳于世也久矣吾從而尊禮
之則其所化服豈若事功之淺乎當元之衰十餘國朝
皆莫能得也地太兵強據名號以雉視中國者十餘人
宋公而賓禮之太祖皇帝上問以金陵獨能聘致太史
不以殺對賓禮之上甚喜俾授太子經每詢以治道公未嘗
有法命將征討飛以勿殺所至民歡樂之識者已謂
天下不足平以海內平定上方借古以新一代之
耳目正彝倫復衣冠制禮樂立學校凡先王之典多
講行之而太史公實與其事在翰林二十年以道德
輔導皇太子聖德寬大仁明而天下歸心愛戴稱
頌洋洋者公之功居多海外殊絕罕至之國朝貢之
士接于國門至必問公起居安否公脩身於戶庭之
間而姓字播于千萬里之外蠻夷異類皆知尊慕之
使中國之美傳于無疆其功所以為盛歟後有賢者考論
必能名其為功此公所以為盛歟後有賢者考論
國朝之所由興而追惟德業之盛以詠歌今日之治
于無窮太史公之功庶幾可白於後世乎

章溢字三益處州龍泉人弱冠從鄉先生王叔剛游
從事於正心脩身之學浙東憲使禿堅不花請與語
悅之已而改官陝西要溢與俱至虎林心忽驚悸力
辭而歸抵家父病已革越八日而逝人以為孝感至
正壬辰蘄黃妖寇自閩犯龍泉溢從子存仁為寇所
執溢心計曰吾兄止有一息不可使無後挺身出謂
賊曰兒幼無所知我願代之賊聞溢名方出重購以
求及得溢大喜賊帥欲問計溢正色拒之曰若等皆
有父母妻子顧為此滅族事耶賊怒繫之柱以刃磨
其脅曰不降者且死溢不為屈賊壯之不敢加害溢

夜給守者乘間脫歸乃集里民為兵不旬日擊却之
石抹宜孫平慶元及建寧之浦城松溪盜溢有力焉
上其功江浙行省承制授溢龍泉縣主簿辭不受海
寇起黃岩寧海攻台城宜孫飛檄召溢為援溢集趨
勇少年數百人晝夜行至城下約內外夾擊寇遁去
溢還龍泉歲儉先以私田易粟貸里人復行勸糴之
政民受其惠青田盜潘惟賢攻龍泉監縣寶忽丁棄
印走溢同王叔剛召豪傑與賊戰敗之復縣治處州
七邑盜蠡起溢奉檄遣千戶曹勝安督兵授以方略
一戰盡降之陞授松陽縣尹又辭不受既而平鄭寇
於麗水退長鎗軍於婺以屢功授奉訓大夫處州路
總管府判官武德將軍僉浙東都元帥府事皆辭不
受青田賊吳英掠金華永康東陽聚眾倡獮分院調
兵屬溢與賊屢戰皆敗之時天下日入於亂溢結廬
匡山又避地入閩中歲庚子

太祖遣使以束帛召溢乃幡然而起與劉基葉琛宋濂
同至建業入見上問勞曰我為天下屈四先生耳
然四海紛紛何時定乎對曰天道無常惟德是輔惟
不嗜殺人者能一之耳上曰卿等其留輔予矣亡
何擢僉營田司事巡行江東兩淮之境田荒蕪及耕

墾者皆分籍之差稅賴之以便溢久病 上時遣使
存問一日 上忽念溢詢于中書都事張來碩曰章
溢日來康強否對曰溢日夜念母弗置而以 主上
遇之厚不敢以言鬱鬱成疾耳 上即命溢歸省賜
白金文綺留其子存厚於京師浙東始設提刑按察
司即擢溢僉事處州總制胡深出師温州 詔溢還
守處州饋餉供億規措無缺民不知勞王師平荆楚
設湖廣提刑按察司移溢僉司事既至觀荆襄多廢
地遂建議分兵屯田且以控制北方計為便 上曰
所言甚善第未暇耳湖廣行省鎮撫回回怙勢作威
輕重人罪溢廉得狀坐以法未幾河內道按察司宋
思顏以浙東憲吏事不白下獄而浙東按察使孔克
仁僉事王璫亦以事被逮辭或連溢溢憂懼無所措
上遣太史令劉基喻之曰予素知章溢守法令毋疑也
胡深兵入閩陷沒處州之境皆動搖 上命陞溢浙
東按察副使往鎮之溢辭曰臣前任浙東無狀同列
皆獲罪而臣獨蒙寬宥今若加陞擢則益重臣過疆
場之事臣身任之萬死且不避副使之命臣不敢拜
上命仍僉司事比至山寨已叛溢宣布 詔旨軍民皆
感動乃誅其首叛者餘皆怙怙青田夏清與福建叅

政范曰大合寇慶元龍泉時官兵盡戍浦城城中僅足自守溢召舊部義兵使據要害列木柵為屯勢相聯絡別命元帥祁興等即龍泉縣治亦環植木城賊聞不敢犯兵戍浦城者以食不繼為病 上以屬溢暨浙東行省右丞李文忠文忠欲運慶州糧餉溢以為舟車不通而軍中所掠糧甚殷請拘入官而均給之兵食乃足青田稅官金甲發具同僚白乙匿官課乙既誅死而甲恣為姦利溢訊之甲善口給辨不置溢曰汝罪狀已明奈何欲以口舌撓法乎甲遂屈上知為溢所鞠當不寃命斬之建寧守將阮德柔遣使

來納款人咸以為詐溢曰陳友定據全閩勢必不能容故德柔為圖自全計非詐也以其事聞 詔許德柔以元官守本郡命比下德柔果為友定所并溢因留其使厚存恤之温州茗陽周遂卿恃山險常為寇隣邑皆患之而郵傳之通平陽瑞安者亦為所要遮溢命長子存道合平瑞總督孫安之兵擒斬遂卿中書命慶州造海舟若干艘并僉溪船戶一千為水軍既有領之者又隸于軍府役繁事擾溢奏設水軍千戶所專統之處多山而少田軍需恒不足胡深為奏免惟輸疏黃白藤于朝而行省復有所科溢奏罷之

水軍千戶任惟淵朱仲欽共戍青田會寇至仲欽逆戰而惟淵走逸仲欽以無援故敗溢斬惟淵以徇遣指揮何世明擊寇走之浙江行省叅政朱亮祖總兵取温州溢調何世明以軍從温州平溢聞其剽人子女命鎮撫林理徵之各部送還其家溢請朝京師上報曰吾知卿在邊良苦俟平吳當即召卿矣及浙西諸郡皆平上乃召溢且命分兵征八閩以存道守處州溢入見上嘉獎甚至諭羣臣曰章溢雖儒臣父子宣力一方寇盜盡平其功誠不在諸將後問征閩諸將何如溢對曰御史大夫湯和由海道進平章

政事胡廷瑞自江西入此固必勝然閩中尤服李文忠之威信若令文忠帥師從浦城取建寧此萬全計也即日詔文忠出師如溢策處州之糧其舊額一萬三千石有時後以軍興加徵至十倍民不堪命溢言之丞相丞相入奏上曰吾勞處民久矣詔從其舊温州黃宗雲朱景達來附各授以元帥還守其土及我師征溫失利輒叛去溫既平雲達各請降溢曰何物小醜叛而復降納之是無法矣奏戮之浙江行省承詔作大舟入海徵輸巨材檄處州與諸府同溢曰處娶之交限以峻險縱有水道何從出且彫弊之

民曷以勝此力言於省臣止之洪武元年正月拜御史中丞尋兼太子贊善大夫濫務存大體不屑屑於細故或以為言濫曰憲臺百司之儀表居其職者當先養人以廉耻使人避而不犯豈直恃搏擊為能哉上親祀社稷會大風雨還坐外朝怒議禮不合以致天變將殺之濫奏曰風雨已連朝無足恠者縱禮官議有未盡陛下誠自足以格神明願寬雷霆之怒上為之霽威存道部鄉兵萬五千從文忠入閩閩平詔存道以兵從海道北征濫持不可曰鄉兵農人耳始令征閩許以事平歸農今復調之是爽信也

上不憚而罷濫繼論奏曰兵已入閩者俾還州里昔嘗叛逆之民宜籍為軍使北征一舉而恩威著矣

上喜曰孰謂儒者果迂闊哉非先生為朕一行無能成茲事者濫受詔遂行比至處州母夫人已歿濫馳還舍援例乞丁憂詔不允丞相李善長復貽書道上眷倚之意而遣存厚還家濫灑泣而出日治戎事惟謹鄉兵既集命存道部領由永嘉浮海北行上章乞守制詔仍不允章再上上覽之惻然曰吾固知其情不可奪矣但朕憲臺缺人耳遂可其奏存道至崑山走京師聽進止上諭之曰汝父事朕宣勞為

多今汝又帥師北上尚勉力事功以無忝爾父則予
汝嘉因授以處州衛指揮副使戍于上黨尋移平陽
溢自喪母悲戚過度及營宅兆親負土石而感疾益
深洪武二年某月某日卒年五十六 上甚憫悼親
撰文遣官即其家祭之溢天性篤於孝友撫世酬物
一本於誠凡綱常大端有關世教者恒舉以語人每
臨大事議論不避權勢必折衷於理平生嘉言善行
不可勝紀當元季羣盜四起磨牙吮血桑梓為墟溢
談笑而殄滅之無遺育處之民思之淪入骨髓于是
聲光流顯上致 萬乘之知持節諸部執法中臺忠

義凜然功業無與為比於戲可謂道德之儒學文武
之全才者歟

王緯字子充金華義烏人生前一夕其祖炎澤夢五
色芝產門楣識者以為文章之兆幼秀爽奇敏及長
長身山立屹然有偉度習古學師事黃潛是時潛為
文章宗工慎許可見緯所業獨深器之即屬以斯文
之任至正戊子元政衰敝緯攬天下事勢為書七八
千言上之時宰嫌其切直格不以聞臨川危公素太
原郝公遠者圖大梁段公天祐濟南張公起巖列薦
於朝皆不報有齊琦者得邵子數推言天人興衰甚

驗見禕歎曰公異代人物也禕亦知世道終不可為
隱青石山著書歲戊戌

太祖皇帝親下金華聞禕名遣使徵至行在一見甚悅
署中書省掾每商略機務悉契 上表甚見禮遇語
必稱子充而不名間與論文章稱善因命采故實為
四言詩以授 皇太子辛丑冬 上親征江西禕進
平江西頌 上覽而喜曰吾固知浙東有二儒者卿
與宋濂耳學問之博卿不如濂才思之雄濂不如卿
癸卯春授江南儒學提舉司校理尋丁外艱乙巳五
月除侍禮郎兼引進使時當創國之初禮制多所定

議是年冬遷起居注嘉言讜論啓沃為多丙午七月
陞同知南康府事兵革之後人民流亡百不存一庶
事皆草創禕披榛莽剔瓦礫以建府署撫摩瘡殘招
集逃散民間其仁稍復業如故則泣之以廉平收士
之賢者廩餼之搜除姦蠹經理廢壞郡以安輯

上聞特賜黃金帶以寵勞之丁未冬 上將即大位召
還議禮洪武元年南閩平出判漳州禕既即郡治如
南康乃上疏曰臣聞自古帝王定天下成大業必祈
天永命以為萬世無疆之計所以祈之者在乎人君
脩德而已君德既脩則天眷自有不能已者書曰皇

天無親惟德是輔此之謂也人君脩德之要有二忠厚以存心寬大以為政二者君德之大端也是故周家以忠厚開國故能垂八百年之基漢室以寬大為政故能成四百載之業簡冊所載不可誣也欽惟陛下負不世出之資奮大有為之志艱難十載大業已成周之文武漢之高光蓋無讓焉臣竊聞之人君莫先於法天道莫急於順人心夫上天以生物為心故春夏以長養之秋冬以收藏之皆所以生物也其間雷霆霜雪有時而搏擊焉有時而肅殺焉然皆暫而不常向使雷霆霜雪無時而不有焉則上天生物之

心息矣人君體上天生物之心故一動一靜之間務合乎天不然則天必示之變異以警戒之人君誠能脩德則豈不足以當天意而承天眷哉此臣所以願陛下之法天道也夫民恃君以為生故人君視民之休戚必若己之休戚誠以君民同一體耳古者歲富於民言取之有節也取之有節則民生遂而得其所陛下近發德音減茶課免軍需蠲邊郡之租稅民心咸悅庶幾得以遂其有生之樂然今浙西既平租稅既廣科歛之當減猶有可議者此臣所以願陛下之順人心也法天道順人心則存於心者自然忠厚施

於政者自然廣大祈天永命之道未有越此者今
陛下建國之始方將立法垂憲以定一代之典制度禮
文之事可議者固多未敢悉數謹舉帝王為治之大
要冒昧以聞 陛下無謂儒者之常談而不加覽焉
上嘉納之二年春 詔脩元史召緯與宋濂同為總裁
官緯於史事雅擅其長裁繁剔穢力任筆削之勞一
無所諉書成拜翰林待制承直郎同知 制誥兼國
史院編脩官掌制代 言凡大詔令多屬焉三年二
月奉 詔預教大本堂緯經明理達開導訓諭道光
師儒每 召對殿廷必賜坐從容宴語非仁義不陳

非帝王治天下之大經大法不舉以告每坐久則賜
飲膳在翰林未久出使土蕃尋召還五年正月

上以天下一統惟雲南弗臣命緯持 詔往諭焉衆謂
緯文學詞臣不宜遠蹈不測之境緯辭色慷慨即日
就道既至見梁王君臣諭之曰

皇上聰明神聖隆啓大業作君萬邦皆天命人心之所
歸惟爾有衆僻在西南久阻聲教故遣使者來諭意
今能祇若 明命亟奉版圖歸職方則尺地一民按
堵如故高爵厚祿身名俱全柰何欲以一隅為中國
抗哉不聽館于別室廩餼有加數日又諭曰予將

命遠來非謂身謀 朝廷以雲南百萬生聚不欲殲
于鋒刃耳曾不聞乎元綱解紐陳友諒據荆湘張士
誠據吳會陳友定據閩關明玉珍據全蜀天兵下征
不四五年率膏鈇鉞惟爾元君北走以死擴廓帖木
兒之屬或降或竄曾無用武之地不煩一刀而天下
大定當是時先服者賞後者僇及宗乃今自料勇悍
強犷孰愈陳張土地甲兵孰愈中國度德籌義孰愈
天朝推亡固存孰愈天命天之所廢誰能興之不然
皇上命將將龍驤百萬會戰於昆池爾如魚游釜中不
亡何待時梁王君臣相顧駭服已有降意命員外郎

賈寬改館禕雅敬之會元之遺孽有自立於朔漠者
遣使脫脫徵糧餉且欲連兵以拒我覘知梁王有二
心因以危言迫梁王殺我使以固其意梁王持兩可
不決命達里麻匿禕於民間脫脫聞之愈責誚梁王
不得已出禕見之脫脫欲以威屈禕罵曰天訖汝元
命我 朝實代之汝如燬火餘燼尚欲與日月爭光
耶我將命遠來豈為汝屈今惟有死而已寧以迫脅
為懼耶顧謂梁王曰汝朝殺我大兵夕至矣遂被害
瘞于地歲寺北時六年癸丑臘月二十四日也年五
十有二又八年辛酉 朝廷興師問罪生擒達里麻

梁王自殺雲南平一如禕言時禕之死事始聞于
中朝然旌褒猶未及正統六年朝廷賜命加
贈謚其文曰為臣奉君命出疆能毅然守節捐軀以
明君臣之大義者雖死必有旌異之榮此風化之所
係帝王之令典也前翰林待制王禕事我

太祖高皇帝於混一海宇之初以博學高文聯職侍近
制作之美有光簡冊暨奉命往諭南詔懷忠秉義不
屈而死臣節凜然光明俊偉歷年已久雖沒不忘今
特贈翰林院學士奉議大夫賜謚忠文服此光榮垂
休無斁至是而禕之大節始暴白於天下後世矣於

戲謀略運于帷幄功業顯于治世文章用于垂憲道
學見于格君忠義著于死事此二者聖賢全體大用
之學也而禕兼之豈非天下古今之全才乎三代而
上氣化隆盛故士多全才繇秦漢以下士之奮興以
表見於世饒智謀者或歎於功業擅文章者或虧於
思義未能備此五者夫豈可多得正坐氣運未全盛
故也當元末大亂必有大治扶輿清淑之氣厚儲旁
魄既篤生我

聖祖為天下君又生多賢從龍佐運共成一代文明
之盛是故禕以全才勃起東南卓冠當時而雄跨百

代豈偶然哉噫是可以論禕矣彼以禕死胡孽比顏
魯公死賊庭同為烈丈夫論蓋舉其重者耳禕之全
不專是

皇明開國功臣錄卷四

耿炳文

吳良

定遠黃金

耿炳文濠州人世居太平鄉孟莊業農父君用至正
壬辰江淮雲擾所在盜賊充斥干戈日相尋於境土
君用四顧彷徨無所于歸謂炳文曰吾父子與其伏
山林又手就戮曷若相率舉義得豪傑而往輔之乃
於是歲八月謁

高皇於濠城一見被蒙知遇自至麾下日備使令授君
用管軍百戶甲午四月領軍隨上取滁洲六月取

城口張營寨取嘉山繆把頭寨七月克餘城守禦校
管軍千戶乙未閏正月從 上領軍取和州守禦校
明威將軍管軍總管三月濠州帥孫德崖乏糧就食
於和因與郭子興有隙甫至即他往 上送之行德
崖軍多蓄異志 上大驚疑炳文翼衛甚至竟保無
他六月朔從 上渡江風順舟速頃刻及岸遂拔衆
石乘勝徑取太平守禦時元中丞蠻子海牙集樓船
結營來石衆數萬陳也先子兆先合淮兵二十萬屯
營方山水陸相望以伺太平丙申二月從克來石寨
獲紅馬餘三月一日破兆先陸寨降其衆十日取金

陵守禦聚寶門志父子相從領軍十七日同父隨徐
達取鎮江守禦四月君用奉命統兵應援常之宜興
地界張士誠勢所必爭則日相還囑各柵木自營盡
死以報稍失尺寸即全軍而死是故人百其勇有死
無二是役也君用賈勇先登用薄蠹附騰柵而上見
斫傷以死猶力戰不休君用既死炳文襲職仍管其
軍六月取廣德耿君美墓誌云炳文守禦丁酉二月
自廣德取長興張士誠將趙打虎以兵三千迎戰敗
之迨至城西門打虎走湖州遂克長興獲戰船三百
餘艘禽士誠守將李福安谷夫蠻等義兵萬戶將義

率所部二百人降有儒士温祥卿者避亂挈家來歸
炳文與語奇之遂留贊軍事用其策分兵據要官設
戰具為守禦計三月改長興州為長安州立永興翼
元帥府以炳文為總兵都元帥守之五月士誠遣其
左丞潘原明元帥嚴再興來寇屯上新橋炳文擊敗
之生擒數百人斬首甚眾元明等遁去踰四年辛丑
十月士誠復遣司法李伯昇率眾十餘萬水陸並進
寇城下城中兵僅七千敵勢甚盛

上命帳前都先鋒陳德等率建康兵元帥華高等率宜
興兵萬戶費聚等率廣德安吉兵往援之比至寇兵

夜劫營諸軍皆潰

陳德華高費聚傳皆云辛丑援長
興敗伯昇兵與此不同蓋彼要其

終而言此言其
始非有異也

炳文嬰城固守明日遣左副元帥劉

成出西門迎擊敗之禽其將宋元帥等成追至東門
敵軍下瞰城中運土石填壕隍放火船燒水關攻城
益急炳文於城中晝夜應敵凡月餘既而援兵至伯
昇棄營遁追斬五千餘人甲辰九月改永興翼元帥
府為永興衛親軍指揮使司以炳文為指揮使十月
士誠丞相張士信以兵來侵按丙申張士信已為
國興所擒與此不同
炳文破之獲其元帥宋興祖士信憤怒復益兵圍城
炳文復與指揮同知費聚出戰敗之自是士誠奪氣

不復敢圖長興矣炳文守長興凡十年孤城血戰卒保無虞其功最大丙午八月上命將伐張亡誠先取湖州調炳文後事十一月湖州平遂進圍蘇州諸將分門而軍炳文軍城東北四面困以長圍又架木塔築層樓置弓弩火器於上復設巨砲以擊之城中震恐敵兵屢出挑戰屢劔而入吳元年九月城破士誠就擒論功召見戟門賜采段表裏陞大都督府僉事降褒諭有今日之功無忝古之名將等語是冬從征中原克山東沂益等州郡明年正月

上即帝位改元洪武進功臣秩授鎮國上將軍兼右率

府副使三月克汴梁四月克河南府五月召回扈從

車駕北巡時以汴梁為北預虞機務七月還京師九

月同常遇春克大同十月克懷慶澤潞二州十一月

大同守禦十二月拔平陽克太原二年二月以其軍

從大將遠征陝西時兩軍人馬甚盛方事讎殺夾武

功東川兩陣思齊在其東思道壘其西日數挑戰辱

食以俟曾不少辭衣甲蟻蝨生身而瘡弗恤也如是

者數月餘兩軍相敵無少休暇大槩彼稍隙我即進

以是堅固力不能支相與遁去遂既得其地即以炳

文鎮守之大軍西進供億繁急炳文奉檄連餉五千

石赴鞏昌八月 上遣都督吳禎以勅諭大將如河中四外已寧則以都督康茂才所部士卒三分其一增守陝西命炳文統馭如故炳文之守陝西也慎嚴號令練習軍伍而愛養之脩築涇陽縣洪渠堰又浚堰渠十萬三千餘丈民皆利焉是年冬大賞守禦功有白金文幣之賜三年正月開設秦王府授府左相直言正色多所匡正六月開陝西等處行中書省命以左相兼行省右丞階資善大夫尋開行大都督府命署都督僉事十一月大封功臣授開國輔運推誠宣力武臣榮祿大夫柱國秦王府左相兼陝西行省

右丞封長興侯食祿一千五百石賜鐵券其文曰朕以武功定天下將多出鄉里皆忠效力此帝業所由成也咨爾炳文以英勇之資從朕渡江以來累立戰功坐戍長興軍肅民安時姑蘇未平爾獨堅守敵來臨境能俘獲而斬之朕由是無東顧之憂及平浙西以功陞居督府征取中原從朕北巡分鎮陝右爾勲益茂朕甚嘉之今天下已定論功行賞朕無以報爾是用加爾爵祿使爾子孫世世承襲朕本疎愚皆遵前代哲王之典禮茲與爾誓若謀逆不宥其餘若犯死罪爾免二死子免一死以報爾功於戲昔光武之

興耿弇父子皆立功當時揚名後世而爾父子兄弟忠顯著於一門蓋有光於昔焉尚其薦爾忠貞加之恭慎以保令名訓及後嗣延於永世不亦美歟詰文同仍賜文綺及帛四十疋炳文自陳祿薄願得陝西田租命以陝西田租五百石浙西田租千石兼賜之四年賜臨濠山地若干頃佃戶若干人守墳人一百戶及儀仗戶十五戶京衛軍士充之五年以後連鎮陝西十三年十二月炳文故元平章乃兒不花等寇邊十四年正月上命炳文領軍輔大將達討之賜鈔百錠遣行四月至塞外大破虜兵於北黃河等處俘

獲人馬數多悉送達所十五年七月詔遣巡視陝西城池督軍屯田十二月炳文計訓練陝西二十二衛校卒凡一十萬六千八百七十四人得驍勇騎士一萬九千七百九十人習馬二萬三千五百疋十六年雲南平命往諭征南將軍頴川侯傅友德等班師兼視各處城堡郵傳籍軍數田糧十九年從征雲南二十年討曲靖普安復叛諸蠻寇平之其同定遠侯北征獲故元餘孽及後宮妃后於捕魚兒海則二十一年也二十四年上念炳文開國勲舊相從濟江翼戴興運宣忠效勞有年顧稽其賞賚卹典乃勅賜緡

鏹五萬定與造第鳳陽鈔二千錠與葺先營黃金四
定白金四十定鈔一千定文段表裏三十尺安富厥
家復推榮其三世曾祖某贈鎮國將軍僉大都督府
事護軍封臨淮縣子曾祖妣某氏封臨淮縣子夫人
祖某贈驃騎將軍都指揮使護軍封高陽伯祖父即
妣某氏封高陽伯夫人君用贈榮祿大夫同知都督府事封長興侯妣某氏
封長興侯夫人二十五年陝西徽州兩當縣妖人作
亂承制總兵聲討至二十七年始克之三十年蜀中
賊兵猖獗命為征西將軍往勦之兵至漢中階文後
河南北禽賊首高佛興俘其眾三千餘人以獻三十

一年鎮守遼東三十二年十月自遼東率眾十餘萬
援真定戰歿於陣年六十五炳文沉勇有將畧用兵
莫測其機攻城畧地百戰百勝前後從軍數十年中
間多其父子之兵與其所自得之兵最苦戰者長興
之後當姑蘇嶋張之日長興固其藩籬當其有事於
東吳也首策雪川為斷蘇之右臂彼折兵以禦我其
力分全軍以出戰其勢空在敵有手足不相應之患
而我無腹背受敵之虞一遵成筭以集大勳洪武二
十三年肅清逆黨榜示勲臣姓名隨類各為標目皆
上所親定以炳文附徐達為一等曰連歲總兵功高望

重其褒重之如此其忠心事。上有功而不伐位
高而能下故終

聖祖之世以功名自全非諸將所能及也子獯龍虎將
軍後府都督僉事有戰功痘散騎舍人擢尚寶卿伯
父君美初從舉義克滁和以疾不仕兄弟數人皆貴
顯曰瑞渡江從取姑熟鎮江諸郡克長興為翼總曰
拱明威將軍管軍總管曰珏武毅將軍涼州衛千戶
曰良驃騎將軍廣西都指揮使曰忠松州衛指揮陞
左府都督僉事有傳曰孝明威將軍永平衛指揮從
子琇國賓尚清湘郡主起桂林左所鎮撫昇昱暹昇

皆居長興云

吳良定遠昌義鄉人初名國興後賜今名氣岸雄偉
性質剛直與弟禎俱以勇略稱元至正中江淮兵擾
皇祖以聰明神武仗大義奮起布衣良兄弟委身相從
服勤左右贊謀效勇 上深器焉甲午秋從取滁州
乙未春從克和陽常為先驅戰皆有功六月從渡大
江與元兵戰於朱石拔其營乘勝克姑孰尋下溧水
溧陽丙申三月從定建康戰功為多又從徐達克鎮
江兵不血刃八月從圍常州張士誠守兵已數萬復
遣其弟九六益兵來援良從擊敗之復敗青軍之叛

者丁酉三月遂下常州歷陞鎮撫六月同常春分院判官趙繼祖元帥郭天祿取江陰張士誠兵據秦望山以拒我師良引兵攻之會大風雨其兵奔潰我師據其山翌日進攻州之西門克其城江陰既下領兵守禦丹陽能聲著聞未幾

上念江陰為重特陞良為指揮使移兵守之時江陰守兵不滿五千而其地與士誠接境士誠據姑蘇跨有淮東浙右地大物衆兵食富強實江南一勍敵而江陰正當東南要衝枕大江扼姑蘇通州濟渡喉襟之地士誠又多變詐動以金帛啗誘將士良行

上諭之曰彼以其詐我以吾誠爾為邊將慎守封疆約束士卒毋外交毋納逋逃毋逐小利毋與爭鋒惟保境安民而已良奉命惟謹繕城池建樓櫓遠斥堠利器械嚴部伍士卒無敢逃亡及出境生事者明年戊戌春復命禎增兵協鎮其地軍容益張秋敵人來侵良出兵敗之俘數十人獲所棄弓弩甲仗以千數捷聞拜樞密判官錫之銀章行分院事又明年二月寇復犯境家衝蔽江偽將蘇同僉者建牙君山指畫為進攻狀良下令曰彼來我寡當以計破之勿輕動也有頃敵陳于江壩良命禎整兵北門當其西北面以

十餘騎蹂之禽其卒數人餘黨莫敢前且分兵欲攻我東門良遣元帥王子明馳出一鼓而進生獲其偽帥陶某以下百五十人殺溺死者甚衆敵大敗宵遁十月寇逼常州良遣兵間道殲其援兵於無錫之三山敵狼狽奪氣蒼黃旋軍常得無害自是敵人震懾相戒勿犯其舟師不敢泝大江上金焦烽燧無警庚子秋八月良被召至建康入見

上勞之曰吳院判保障一方使吾無東顧憂其功大矣賜之車馬珠玉不足以旌其能命館閣學士宋濂等爲詩文美之乙巳歲除日敵夜以巨艦數百艘直擣

京口良戒嚴以待越二日上親統舟師追襲至境大破之寇退臨幸見其防禦有方謂曰汝非昔之吳起乎稱歎久之既還師大錫賞賚偏裨咸預焉良在鎮仁勇不妄刑殺有犯則必罰無貸將士悅服親之如父母畏之如神明平居儉素自持食不貳味聲色貨利泊無所嗜夜宿城樓枕戈警備無變厥初暇日則延章逢士講論經史兵法訓督將校務成其材馭胥吏有法不少假借莫敢欺以私獎勵名節鼎新學宮勸立社學崇尚士習絃誦相聞禮義並興市絕喧爭官無詘訟又屯田以足軍餉平徭以蘇民力嚴

條約以禁游惰詰姦隱有一男子自稱神師妄言禍福蠱惑者衆即捕斬之歲旱躬自禱祠大雨滂澍年用有登居十年軍民莫枕一境帖然

上親將兵下江西克湖廣平陳友諒大軍屢出東藩竟無擾皆良為之捍蔽然後例改分院為指揮使司仍以良長之丁未九月大軍克姑蘇士誠面縛

上以姑蘇承士誠割據之餘力戰乃服必得剛毅有智畧者鎮其地遂以命良制曰國家設衛臨於江海之疆將帥得人慰此安民之望眷予勲舊錫之寵褒江陰衛指揮使吳良勇而善謀仁而有智濠梁起事執

兵直抵於滁陽采石渡江隨駕即趨於建業擢省垣之鎮撫守丹陽之要衝乃顧江陰界於浙右授斧鉞之重寄綏田里而均安兄弟既和城池益固君山禦敵精騎突而俘其暴兵毘陵解圍副將往而擒其渠帥效勤既久遷秩宜加移鎮姑蘇展戎器於外闡紀功石室佐王業於明時可昭勇大將軍蘇州衛指揮使良奉宣 上德武備益脩防禦益固軍民輟睦一如江陰進鎮國上將軍僉大都督府事洪武三年天下大定大封功臣援開國輔運推誠宣力功臣榮祿大夫柱國同知大都督府事封江陰侯食祿一千五

百石賜鐵券其文曰朕當開創之初賴智勇之士廓
清海宇佐成帝業武功既集宜舉崇報之典咨爾吳
良以定遠之英與朕同郡當天下雲擾為朕所用乃
從擣滁州克和陽取姑孰至於溧水溧陽之戰建業
京口以及毘陵之攻宣力效勳已有可稱及守江陰
實當東南要衝數年之間爾能堅守使敵人知畏而
不敢窺姑蘇既下委爾鎮之又能兵衛整嚴紀律明
肅邊安人民朕念爾初起之舊十有七年之間多著
勲績今天下已定論功行賞朕無以報爾是用加爾
爵祿使爾子孫世世承襲朕本疎愚皆遵前代哲王

之典禮茲與爾誓若謀逆不宥其餘若犯死罪爾免
二死子免一死以報爾功於戲惟爾兄弟為朕之勲
臣尚思恭慎益大爾功訓及子孫永延于世豈不偉
歟誥文同仍賜文綺及帛三十疋尋命視都督府事
四年賜臨濠山地若干頃佃戶若干戶守墳人一百
戶廣西右江諸州僻處炎徼去中國遠數千里前古
號為要荒乍臣乍叛唐宋以來羈縻而已元都北方
相去益遠姑息尤甚夷俗狃於仇殺數侵盜邊境五
年正月命良為征南將軍討之良率兵深入跋履崇
山踐歷險阻剪薙荆棘衝冒瘴霧劬勞特甚數月盡

平其地俘獲不可勝計辰靖等州五溪蠻相繼作亂
良復移兵擊勦五月八日師次渠陽之靈溪一鼓而
入銅鼓破五關行渾溪再鼓而踣騰浪附篤莫越漂
洞開太平山之路三鼓而服地青滅隆徒通洪州良
之心猶欲化之以德懷之以恩招附納降不忍加戮
而蠻獠之尤黠者有曰情洞崖山據銅關鐵寨以抗
大軍良始肆其武悉殲厥衆古州八萬乃懼而降曰
洞曰寨凡二百餘所編戶附籍願為之氓不踰四月
群境惟謐渠陽之民咸相告曰往歲綏寧洞獠叛賴
侯一戰而清今年會同洪江賊反縣治毀令佐戕侯

復遣將生擒之惟古州之蠻地廣人衆今又悉定化
外之地附於一國推髻之俗變為衣冠乃刻石以紀
功自是溪洞蠻夷畏威懷德革心向化輸租賦奉法
令同內地焉八年 上移江南民十有四萬於鳳陽
使各農田而實地以壯京畿命良同李善長周德興
等督責其事先是 上稽古制建親王為藩屏齊王
受封青州十二年命良營建王府宮殿社稷良經營
區畫部署軍卒並手偕作功成而民不勞

上以勅勞之曰昔者朕與群雄爭命卿藩東鄙既而往
戍高深城隍沃野開闢當是時朕用事於荆楚無東

顧憂遂滅荆楚之妖雖諸將效力於西卿保東藩為
重終首尾內姦無出外姦無入可謂智矣天下平卿
爵侯封乃朕報功也前者第七子博封為齊王特與
卿結姻命卿如齊肇造宮殿今將新年遣人賜酒禮
以勞十四年十一月二十六日卒于青州年五十八
上為之震悼輟朝三日親為文祭之曰昔忠臣之士從
君堅身許之志故犯患涉難以尊一人而安天下蒼
生立高名不朽於史冊今古智人覽之無不懽心爾
良從朕於擾攘之秋年馳月驅櫛風沐雨野宿風餐
被堅執銳十月七載方封侯爵今之十一年矣正欲

安享富貴何期為營造而出嬰微疾而長往訃音至
京朕何言哉然為將之士忠於君而能平禍亂為民
作福而乃身得善終爾無憾矣贈特進光祿大夫上
柱國中軍左都督追封江國公謚襄烈遣使者迎柩
以歸十五年二月賜葬鍾山之陰

上念其功不已命詞臣撰文勒碑以垂無窮仍塑像祭
于功臣廟良白起身行伍至為將帥受封爵始終一
致有功無過上於諸將中特倚重之故其薨也恩
禮有加且與禎同際興運同立大勳同膺高爵同以
忠慎承眷注方之宋吳玠吳璘功齊而德倍之曾祖

三七贈鎮國將軍僉大都督府事護軍追封穎上縣
子妣周氏封穎上縣子夫人祖千一贈驃騎將軍都
指揮使護軍封延陵伯妣劉氏封延陵伯夫人父似
龍贈榮祿大夫同知大都督府事柱國封渤海侯妣
葉氏封渤海侯夫人配高氏封江陰侯夫人子二人
長曰高神策衛指揮署前軍都督僉事襲江陰侯有
戰功鎮守大同次曰寬孫十一人亮晟景昂昱昇暹
旻曷冕常曾孫二十一人琮瑛瑁琰琿珍能璉珣璆
逢貴逢泰逢吉順信瑛瑤琇元亨利玄孫二十一人
繼武繼文繼勳東顧多乾坤克卿舜卿漢卿梁卿濟
卿晉卿魏卿唐卿周卿宋卿武卿虞卿契卿竊觀我
聖祖取天下躡蹠羣雄而顛倒之所可戒備者首偽漢
次偽吳二國境壤相連使其謀通兵結亦大費征討
聖祖妙識其幾欲翦漢之羽翼故遣耿炳文守長興吳
良守江陰以蔽吳二臣者不孤所托謀足以制敵勇
足以讐敵孤軍血戰於魏絳萬竈之強者數年卒使
吳人一迹不敢西向

聖祖無東顧之虞然後得以麀偽漢而殲之是蔽吳者
正所以滅漢也漢既滅于焉併力向吳釜魚籠鳥何
所假息故亦不旋踵而亡是滅漢者又所以滅吳也

識者謂吳不亡於諸將合圍之時而亡於二臣善守
之日亦信然哉是故論開國之功二臣為大而二臣
之功於是為大況其忠誠金石不渝後功輝映乎前
烈當逆黨既清榜勲臣昭示天下以二臣麗徐達鄧
愈題曰功高望重夫以

聖祖之神明睿哲而品譽之如此必其鴻休茂實簡在
上心一天下之公與也後之欲知二臣者其尚有考於
是哉

